



## SLUŽBA ZA REVIZIJU FINANSIJSKOG POSLOVANJA

Na osnovu člana 14. stav (1) Zakona o finansiranju političkih stranaka („Službeni glasnik BiH“ broj 22/00), člana 24. Pravilnika o godišnjim finansijskim izvještajima političkih stranaka („Službeni glasnik BiH“ broj 61/06) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08) izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2007. GODINU NARODNE BOŠNJAČKE STRANKE

Broj: 03-07-6-861/08  
Sarajevo, 18. maja 2009. godine

## SADRŽAJ

MIŠLJENJE REVIZORA .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS PREGLEDA I KONTROLE FINANSIJSKOG IZVJEŠTAJA .....	5
Predmet pregleda i kontrole .....	5
Cilj pregleda i kontrole .....	5
Obim pregleda i kontrole .....	5
4. PRETHODNE KONTROLE I REVIZIJE .....	5
5. NALAZI I PREPORUKE .....	5
5.1. NALAZI.....	5
5.2. PREPORUKE .....	6

## MIŠLJENJE REVIZORA

Služba za reviziju finansijskog poslovanja u Centralnoj izbornoj komisiji Bosne i Hercegovine izvršila je pregled godišnjeg finansijskog izvještaja **Narodne Bošnjačke stranke** za 2007. godinu.

Rukovodstvo stranke je odgovorno za finansijske izvještaje, postupanje stranke u skladu sa Zakonom o finansiranju političkih stranaka i uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Na osnovu našeg pregleda utvrđeno je sljedeće:

- 1. Narodna Bošnjačka stranka je prekršila odredbe člana 6. Zakona o finansiranju političkih stranaka.**
- 2. Stranka je prekršila odredbe člana 11. stav (3) i (4) Zakona o finansiranju političkih stranaka.**
- 3. Stranka nije ispoštovala odredbe člana 12. stav (2) Zakona o finansiranju političkih stranaka.**

Na osnovu našeg pregleda, odnosno kancelarijske revizije finansijskog izvještaja, osim gornjih napomena pod 1., 2. i 3. nismo zapazili ništa značajno što bi ukazalo na druge nedostatke u izvještaju ili finansiranju ove političke stranke suprotno Zakonu o finansiranju političkih stranaka.

## 1. UVOD

Služba za reviziju finansijskog poslovanja u Centralnoj izbornoj komisiji BiH (u daljem tekstu: Služba za reviziju) je izvršila pregled godišnjeg finansijskog izvještaja Narodne Bošnjačke stranke za 2007. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka („Službeni glasnik BiH“ broj 61/06) i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08).

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Narodna Bošnjačka stranka je iskazala prihode u iznosu od 440,00 KM, čija struktura je data u sljedećoj tabeli:

Red.br.	Vrsta prihoda	Iznos u KM	Učešće u ukupnom prihodu %
1	Članarina	0,00	0,00 %
2	Prilozi fizičkih lica	440,00	100,00 %
3	Prilozi pravnih lica	0,00	0,00 %
4	Prihodi od imovine	0,00	0,00 %
5	Prihodi od pr.lica	0,00	0,00 %
6	Prihodi od poklona	0,00	0,00 %
7	Prihodi iz budžeta	0,00	0,00 %
8	Ostali prihodi	0,00	0,00 %
	<b>Ukupni prihodi:</b>	<b>440,00</b>	<b>100,00%</b>

U godišnjem finansijskom izvještaju politička Narodna Bošnjačka stranka je iskazala ukupne rashode u iznosu 5.525,00 KM.

## 2. PREDSTAVLJANJE POLITIČKE STRANKE

Naziv političke stranke: Narodna Bošnjačka stranka. Skraćeni naziv je NBS.

Politička stranka Narodna Bošnjačka stranka je registrovana 19.04.2002. godine kod Kantonalnog suda Sarajevo, pod brojem R-I-3/02.

Sjedište političke stranke je u Sarajevu, ulica Hamdije Kreševljakovića br. 61/II

Prema podacima iz godišnjeg finansijskog izvještaja za 2006. godinu, ovlašteno lice za zastupanje stranke je Nedžad Latić, predsjednik.<sup>1</sup>

Podaci o ovlaštenom licu za podnošenje finansijskih izvještaja za 2007. godinu nisu iskazani u godišnjem finansijskom izvještaju.

Prema podacima iz godišnjeg finansijskog izvještaja, organizacionu strukturu Narodne Bošnjačke stranke čini Centrala stranke.

<sup>1</sup> Prema Izvodu iz sudskog registra broj: PF-2587/08 od 04.06.2008. godine, sjedište Narodne Bošnjačke stranke je u Sarajevu, ul. Jadranska br. 13, a ovlašteno lice za zastupanje stranke je Bakir Tanović, predsjednik stranke.

### 3. OPIS PREGLEDA I KONTROLE FINANSIJSKOG IZVJEŠTAJA

**Predmet pregleda i kontrole** je godišnji finansijski izvještaj Narodne Bošnjačke stranke za 2007. godinu.

**Cilj pregleda i kontrole** je da revizor na bazi finansijskog izvještaja pokuša da ustanovi da li je Narodna Bošnjačka stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenog zakona, ocjenjuje da li je potrebno izvršiti reviziju u prostorijama političke stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

**Obim pregleda i kontrole** finansijskog izvještaja Narodne Bošnjačke stranke obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih lica.

### 4. PRETHODNE KONTROLE I REVIZIJE

U prethodnom periodu izvršeni su pregledi godišnjeg finansijskog izvještaja Narodne Bošnjačke stranke za 2005. i 2006. godinu, nakon kojih su izdati izvještaji o pregledu sa mišljenjem revizora, nalazima i preporukom revizije da stranka treba postupati u skladu sa odredbama člana 5. stav (1) Zakona o finansiranju političkih stranaka i da finansijske izvještaje treba popunjavati u skladu sa odredbama člana 11. stav (3) Zakona o finansiranju političkih stranaka i Pravilnikom o godišnjim finansijskim izvještajima političkih stranaka.

#### **Realizovane preporuke**

U skladu sa preporukama iz izvještaja o pregledu Narodna Bošnjačka stranka je preduzela određene korake te je u 2007. godini nije primala priloge preko zakonom dozvoljenog limita, odnosno postupila je u skladu sa odredbama člana 5. stav (1) Zakona o finansiranju političkih stranaka.

#### **Nerealizovane preporuke**

Na osnovu uočenih nedostataka u godišnjem finansijskom izvještaju za 2007. godinu, utvrđeno je da politička stranka nije ispoštovala sve preporuke koje su date u izvještajima o pregledu finansijskih izvještaja za 2005. i 2006. godinu, odnosno postupila je suprotno odredbama člana 11. stav (3) Zakona o finansiranju političkih stranaka.

### 5. NALAZI I PREPORUKE

#### 5.1. NALAZI

- a) **Na osnovu obavljene kontrole godišnjeg finansijskog izvještaja utvrđeno je da je Narodna Bošnjačka stranka prekršila odredbe člana 6. Zakona o finansiranju političkih stranaka.<sup>2</sup>**

Pregledom je utvrđeno da stranka zaključila ugovor o zakupu poslovnog prostora u Sarajevu sa NID „Bosančica print“ iz Sarajeva<sup>3</sup> sa ugovorenom zakupninom od 300,00 KM mjesečno. Kako stranka nije u obrascu 3-e (nenovčane donacije i računi koje stranka nije imala obavezu da plati)

<sup>2</sup> Članom 6. Zakona o finansiranju političkih stranaka propisana je obaveza prijavljivanja svakog priloga pravnog i fizičkog lica čiji iznos premašuje 100 KM.

<sup>3</sup> Ugovor bez naznačenog datuma zaključivanja i trajanja ugovora o zakupnini poslovnog prostora površine 32 m<sup>2</sup> u ulici Hamdije Kreševljakovića 61/II u Sarajevu sa NID „Bosančica print“.

godišnjeg finansijskog izvještaja iskazala prilog pravnog lica NID „Bosančica print“ u iznosu od 3.600,00 KM, prekršene su odredbe člana 6. Zakona o finansiranju političkih stranaka i člana 18. Pravilnika o godišnjim finansijskim izvještajima političkih stranaka.

**b) Stranka je prekršila odredbe člana 11. stav (3) i (4) Zakona o finansiranju političkih stranaka.**

- Stranka je prekršila odredbe člana 11. stav (3) Zakona o finansiranju političkih stranaka<sup>4</sup> jer nije popunila obrasce godišnjeg finansijskog izvještaja u skladu sa Pravilnikom o godišnjim finansijskim izvještajima političkih stranaka.

Narodna Bošnjačka stranka nije pravilno popunila obrazac 1 (opšti podaci o političkoj stranci) jer nije iskazala sljedeće podatke: naziv suda i broj i datum upisa političke stranke u sudski registar, imena lica ovlaštenih za zastupanje stranke i ime ovlaštenog lica za finansijske izvještaje, što nije u skladu sa članom 9. Pravilnika o godišnjim finansijskim izvještajima političkih stranaka.

Stranka nije u godišnjem finansijskom izvještaju iskazala troškove zakupnine poslovnog prostora u iznosu od 3.600,00 KM, što nije u skladu sa članom 21. Pravilnika o godišnjim finansijskim izvještajima političkih stranaka. Stranka, takođe, nije tačno iskazala ni ukupne rashode, čime je prekršila odredbe člana 20. istog Pravilnika.

- Narodna Bošnjačka stranka je prekršila odredbe člana 11. stav (4) Zakona o finansiranju političkih stranaka jer nije ni na ponovni zahtjev Centralne izborne komisije Bosne i Hercegovine dostavila dodatnu dokumentaciju (bruto bilans i glavnu knjigu)<sup>5</sup>.

**c) Stranka nije ispoštovala odredbe člana 12. stav (2) Zakona o finansiranju političkih stranaka.<sup>6</sup>**

Stranka u godišnjem finansijskom izvještaju za 2007. godinu nije navela ime lica ovlaštenog za podnošenje finansijskih izvještaja, dok je u 2006. godini navedeno da je lice za podnošenje finansijskih izvještaja Hadrović Saima. Ova politička stranka nije u skladu sa članom 12. stav (2) zakona izvjestila Centralnu izbornu komisiju BiH o promjeni statusa ovlaštenog lica za podnošenje finansijskih izvještaja.

## **5.2. PREPORUKE**

*Preporučuje se Narodnoj Bošnjačkoj stranci da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

➤ *Da postupa u skladu sa odredbama člana 6., člana 11. stav (3) i (4), i člana 12. stav (2) Zakona o finansiranju političkih stranaka i to:*

- *da priloge pravnih lica koji iznose više od 100 KM iskazuje u godišnjem finansijskom izvještaju,*

<sup>4</sup> U skladu sa odredbama člana 11. stav (3) Zakona o finansiranju političkih stranaka, a prema kome stranka podnosi finansijski izvještaj u formi koju odobri Centralna izborna komisija, donesen je Pravilnik o godišnjim finansijskim izvještajima političkih stranaka kojim su propisani sadržaj i forma finansijskog izvještaja.

<sup>5</sup> Urgencija Centralne izborne komisije BiH broj 03-07-6-861/08 od dana 10.03.2009. godine.

<sup>6</sup> Svaka politička stranka dužna je obavjestiti Centralnu izbornu komisiju BiH o imenovanju ovlaštenog lica odgovornog za podnošenje finansijskih izvještaja i vođenje knjiga koje je dužno da kontaktira sa Centralnom izbornom komisijom BiH u roku od tri (3) dana od njenog imenovanja, i o slučaju bilo kakve promjene statusa tog lica dužna je u roku od tri (3) dana obavjestiti Centralnu izbornu komisiju BiH o toj promjeni.

- *da finansijske izvještaje koje podnosi Centralnoj izbornoj komisiji BiH sačinjava u formi propisanoj Pravilnikom o godišnjim finansijskim izvještajima političkih stranaka i da na zahtjev Centralne izborne komisije BiH dostavlja dodatnu dokumentaciju, i*
- *da obavijesti Centralnu izbornu komisiju BiH o promjeni ovlaštenog lica za podnošenje finansijskih izvještaja.*

#### **KOMENTAR**

U ostavljenom roku, Narodna Bošnjačka stranka se nije očitovala na Preliminarni izvještaj o pregledu godišnjeg finansijskog izvještaja za 2007. godinu.

Hasida Gušić, šef Službe za reviziju

Sanja Čabrilo, revizor

Željko Bakalar, pomoćnik revizora